

# ANN DUD FALL

**d'ann traon !**

---

Red vezo kass da Baris kanadourien nevez,  
Ha varc'hoas setu digor kelorn ar voterez,  
Disliv ounn gant ann derchen, dirak ar voestik-se...  
Ar vuez a zo enni, ar maro zo ive.

Buez ! mar domp kalounec ha ma stlapom a-bell  
Ar Barveien divadez a ra deomp ar brezel :  
Maro ! ma zomp krenerien ha ma verzomp hor bro  
Oc'h eva bilim aeret e-skeud ar bod ilio.

Bro-C'hall ! na c'hui ioa skeduz p'or boa prinset kristen,  
Cleze braz ouz ho c'hostez, kelc'hik-aour var ho fenn,  
Var ann enor, ar justis ho zron a ioa harpet,  
Hag hano ar Fransisien peb lec'h a ioa brudet.

Petra oump hirio siouas ! nemet tud a netra  
A deu da granchat varnho ar boblou distera ?  
Bro-C'hall elfet da henvel, eb beza tam gaouiat :  
Barados ar ganailles hag ifern ann dud vad !

Livirit d'in, archerien, petra zo a nevez,  
Ma teuit, ann heol c'hoas kuzet da gommans ho tervez ;  
Ha deut e ve d'eoc'h kelou euz laeron, muntrerien,  
Ma velan ganeoc'h bouc'hal ha cleze, ha sabren ?

Ne deus na laer, na muntret o koll d'eomp hor c'houset,  
Ar re a zevaz Paris oll a zo pardonet,  
Mes beza zeuz Jesuistet ne reont nemet pedi...  
Ho dorozou a flastrimp gant penn hor bouc'hili.

Er meas Freret, Seurezet ha c'hui oll kristenien  
A zoug kroaz pe japelet var zae ar binijen !  
Er meas ar groaz he hunan... hag e kuez ar croaziou,  
Euz ti-skol ar vugale ez eont a garradou !

Goude oberou ker brao e fallas d'ann dud-se  
Var dorc'hora digaras kaout eur bodik laure,  
Ar zoudardet rank bale dindan eunn heol bero,  
Hag e Tunis, eb beleg, mil ha mil a varvo.

E-penn labourou quer fall, evit mez Breiz-Izel,  
Hor peuz kalz deputeet ne fell ket d'in henvel.  
Breudeur, bezit kalounec, arabat eo d'eoc'h mui  
Fiziout ann denvedigou enn eur vanden bleizi.